

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 20
Oktubre 21, 2006
www.philippinerevolution.org

Editorial

Pagpaslang kay Bishop Ramento, tanda ng kalupitan ng rehimeng Arroyo

Ang karumal-dumal na pagpaslang noong Oktubre 3 kay Bishop Alberto Ramento, makamasa at patriyotikong tagapangulo ng Supreme Council of Bishops ng Iglesia Filipina Independiente (IFI) ay tanda ng pagtindi ng kalupitan ng rehimeng US-Arroyo sa kampanya nito ng pamamaslang sa mga kritiko nito at paghahasik ng lagim sa lumalabang mamamayan.

Sa pagpaslang kay Bishop Ramento, ipinamalas ng rehimen na hindi ito nangingiming patayin maging ang matataas na lider-simbahan na pinagpipitaganan dahil sa pagiging masugid na aktibista para sa tunay na pambansang kalayaan at demokrasya at puspulang pagtataguyod sa mga interes at karapatan ng mama-

mayan, laluna ng masang anakpawis.

Alam na alam ng rehimen na ang pagpatay kay Bishop Ramento ay maaaring lalong gumatong sa matindi nang galit ng malawak na mamamayan. Kaya gayon na lamang ang pag-iiskrip ng pagpatay sa obispo at pagtatakip ng kanilang pasistang krimen upang palabasing isa lamang itong "simpleng kaso ng pagnanakaw at pagpatay na gawa ng isang karaniwang kriminal."

Pero nagkakamali ang rehimen sa pag-aakalang basta na lamang lulunukin ng taumbayan ang



***Mga tampok sa
isyung ito...***

**"No man's land" sa
Negros** PAHINA 4

**Komboy ng militar
inambus sa Negros**
PAHINA 4

**Pagsirit ng singil sa
kuryente** PAHINA 11

santambak na mga kasinungalingang nilulubid ng Malakanyang at Philippine National Police (PNP) para ipilit ang iskrip nila.

Isang independyenteng *fact-finding mission* ang binuo ng mga tagapagtaguyod ng karapatang-tao, progresibong abugado, doktor at kinatawan ng simbahan ni Bishop Ramento para suriin ang mga datos at sirkumstansya ng pagpaslang sa obispo. Matapos ang masusing pagsisiyasat, napasinungalingan ang mga resulta ng "imbestigasyon" ng PNP sa kaso. Napatunayang planado at sadya ang pagpatay sa obispo, taliwas sa pinalalabas ng pulisya na siya'y sinaksak dahil lamang "nanlaban siya sa mga taong nahuli niya sa aktong pagnanakaw sa kumbento."

Animo'y pusang may pinaglaruang daga ang paglalarawan ng *fact-finding mission* sa pumatay sa obispo. Dalawang beses na sinaksak ng salarin si Bishop Ramento sa dibdib at likod habang natutulog pa ito. Pagkatapos ay buong kahayupang pinanood ng berdugo ang sugatang obispo habang gumagapang tungo sa pintuan at humihingi ng saklolo. Walang habag na pinaglaruan ng berdugo ang nag-

aagaw-buhay na obispo at pinahiran hanggang sa tuluyan nang malagutan ng hininga. Pagbagsak ni Bishop Ramento ilang hakbang pagkalampas ng pintuan, muli pa siyang pinagsusugatan sa kanyang daliri at leeg para palabasing nanlaban ang biktima habang ninanakawan ito. Ngunit lumabas sa pagsisiyasat na wala ni gasgas sa katawan o mga bisig ang obispo, na siya sanang tanda kung nanlaban nga siya.

Hindi mapani-niwala ng PNP ang sinumang may hustong isip na pangkaraniwang panloob lamang ang nangyari. Apat na pipitsuging magnanakaw umano ang pumasok sa kwarto ng obispo. Palibhasa'y ang interes lamang ng PNP ay pagtakpan ang katotohanan, mala-milagro ang bilis nito sa "paglutas" sa krimen. Agad umanong "nahuli" ng PNP ang apat na "magnanakaw" at "nabawi" sa mga ito ang mga bagay na "ninakaw"—ang singsing ng obispo at isang DVD player na

nawala dalawang linggo pa bago ang pagpatay.


Di mapasusubalian na ang tunay na motibo sa likod ng pagpaslang sa obispo ay ang pagnanais ng pasistang rehimeng Arroyo na patahimikin ang isang kilala at impluwensyal na kritiko ng pambubusabos at pang-aapi

sa mamamayan, laluna sa mahihirap. Mariin ding tinuligsa ni Bishop Ramento ang mga pang-aabusong militar, pandaraya sa eleksyon, pakanang "Cha-cha" at iba pang mga kasinungalingan at kalupitan ng rehimen. Isa sa mga pangu-

nahin niyang ipinaglaban ay ang kaso ng mga welgista at mga pinatay at dinahas sa Hacienda Luisita. Kaya nga't matagal na siyang isinailalim, kasama ang marami pang progresibong pari ng IFI at iba pang simbahan sa tuluy-tuloy na paniniktik at isinama sa *order of battle* ng militar at mga *death squad* nito. Sa kabila nito, hindi siya kailanman natigatig at patuloy siyang kumilos para sa mamamayan.

Sa pilit na paghahabi pa ng iskrip para palabasing isang karaniwang krimen lamang ang pagpatay kay Bishop Ramento, inakala ng rehimen na mabubura nito ang kabuluhan ng naging buhay, mithiin at pakikibaka ng pinaslang na obispo. Nagkakamali ang rehimen kung akala nito'y mabisang paraan ang gayon para makaiwas sa malawakang pagkundena sa loob at labas ng Pilipinas habang naipagpapatuloy ang kampanya ng pamamaslang at pagdukot sa mga aktibista at iba pang masusugid na kritiko.

Ang pagpaslang kay Bishop Ra-



Taon XXXVII Blg. 20 Oktubre 21, 2006

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.org

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Pagpaslang kay Bishop Ramento	1
Mga paglabag sa karapatang-tao	3
"No man's land" sa Negros	4
Ambus sa Negros	4
RSOT sa Bondoc Peninsula	5
Digmang bayan sa Ilocos-Cordillera	6
Pakikipag-usap sa MILF, sinasabotahe ng rehimen	8
Kasaysayan ng pananabotahe	9
Pambobomba sa Mindanao, pakana ng rehimen	10
Pagsirit ng presyo ng kuryente	11
Ang EPIRA	11
Balita	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

sundan sa Editorial, pahina 3

ANG BAYAN Oktubre 21, 2006

Nagpapatuloy na karahasang militar

Isang aktibista sa Laguna ang pinakahuling naitalang biktima ng mga walang puknat na pagpatay sa mga progresibong pwersa. Sumusunod ang mga kaso ng abuso-militar na nakalap ng AB nitong Setyembre at Oktubre.

Oktubre 18. Pinatay sa Barangay San Gregorio, San Pablo, Laguna si Eduardo Millares, 50, myembro ng Samahang Magkakapitbahay sa Taging Riles (SMTR), kapatid na organisasyon ng Kadamay. Si Millares ay papasok sa trabaho nang siya'y lapitan at pagbabarilin. Nasugatan sa insidente si Victoriano Carriño, 42, kapitbahay ni Millares. Mahigpit na tinututulan ng SMTR ang demolisyon ng daan-daang bahay sa taging-riles sa San Pablo. Bago ang pamamaslang, may ilang araw nang hinaharas ng mga sundalo ng 22nd IB si Millares sa kanyang bahay. Sa kabila nito, pilit idinadawit ng pulisya si Millares sa pagnanakaw at iginigiit na ang pagpaslang sa kanya ay bunga lamang ng alitan niya at ng isang sindikatong kriminal.


Oktubre 9. Anim na pari ng Iglesia Filipina Independiente (IFI) ang pinagbabantaang patayin.

Ibinunyag ni Fr. Gilbert Garcia ng Diocese of Tarlac na bukod sa mga natatanggap niyang mapag-

bantang *text message*, tatlong nakabonet na lalaki ang namataang umaaligid sa kanyang simbahan noong umaga ng Oktubre 9. Si Father Garcia ang itinalagang tagapagsalita ng dyosesis hinggil sa pagkamatay ni Bishop Alberto Ramento.

Bukod sa kanya, iniulat ng Promotion of Church People's Response (PCPR) na pinagbantaan ding isusunod sa pinaslang na obispo sina Fr. Terry Revollido ng Pangasinan; Fr. Romeo Tagud ng Negros; Fr. Marco Sulayao ng Panay; Fr. Sonny Teleron ng Western Mindanao; at Fr. Antonio Ablon ng Cagayan de Oro.

Oktubre 8. Pinatay sa kanyang bahay sa Barangay Baiao, Tago, Surigao del Sur si Fr. Dionisio Ginging, 53, pari ng IFI na kritikal din sa rehimen. Si Reverend Ginging ay pinagtataga muna ng tatlong lalaking nakabonet bago barilin. Siya



ang ika-24 nang kasapi ng IFI na pinaslang mula nang maging presidente si Gloria Arroyo noong 2001. Pinalalabas ng PNP na ang nangyaring pagpatay ay kaugnay lamang umano sa pagkakasangkot ng pari sa iligal na pagtotroso.

Setyembre 11. Halos isang linggong nilisan ng mga tao ang Barangay Bagacay at Osmeña sa Palapag, Northern Samar matapos ihamlet ng 63rd IB nang kalahating araw ang mga taga-Bagacay.

Humigit-kumulang 500 pamilya ang nagbakwit para makaiwas sa matinding pang-aabuso ng mga sundalong nakabase sa Barangay Burgos, Mapanas, Northern Samar. Mga tagabaryo ang pinagbalingan ng militar matapos nilang makasagupa ang BHB sa Sityo

Ibaliw, Barangay Bagacay noong Setyembre 11.

Setyembre 8. Dinakip at tinortyur bago paslangin ng mga elemento ng 63rd IB si Jerick Lucindo, 18, taga-Sityo Cag-anibong, Barangay Bagacay, Palapag, Northern Samar. May binili lamang si Lucindo sa Barangay Bagacay at papauwi na nang makasalubong niya sa kalsada sa Sityo Canunghan, Barangay Osmeña, Palapag ang mga nagpapatrolyang sundalo. **AB**

Editorial, mula sa pahina 3

mento ay tanda ng sukdulang arogansya ni Gloria Arroyo. Tulad ng pinakapusakal na mga pasista ng kasaysayan, kung umasta siya'y tila wala nang hangganan ang kanyang kapangyarihan at kahit ano pang uri ng kalapastanganan ay maaari niyang balutan ng kasinungalingan, ipatanggap sa mamamayang Pilipino at palusutin sa pambansa at pandaigdigang opinyong publiko. Labis na pagmamaliit at pangungutya ito sa kakayahan at determinasyon ng mamamayang Pilipino na alamin at ilantad ang katotohanang pilit na tinatapan ng rehimen, biguin ang madugo nitong kam-

panya ng pamamaslang at panunupil, at kumilos para labanan ang kanyang paghahari hanggang maibagsak ito.

Sa katuus-tuusan, ang pagpaslang kay Bishop Ramento ay tanda ng lalim ng desperasyon ng bulok at pasistang rehimen ng Arroyo na durugin ang lahat ng pwersang kumakalaban dito.

Katulad rin ito ng mga pagkakamaling pinagbayan nang malaki ng pasistang diktador na si Marcos noon. Walang magiging pagkakaiba ang bigat ng husga at parusa ng mamamayan at kasaysayan sa brutal na paghahari ni Gloria Arroyo at mga karumal-dumal na krimen niya sa bayan. **AB**



Anim na barangay sa Negros, "no man's land"

Mistulang "no man's land" ang mga bulubunduking baryo ng Calatrava, Negros Occidental dahil sa malupit na mga operasyon ng 11th IB, 61st IB, 3rd Scout Ranger Company at bandidong Revolutionary Proletarian Army sa desperasyon nilang tugisin ang mga Pulang mandirigma ng Bagong Hukbong Bayan (BHB).

Ang malawakang operasyong militar ay sinuportahan ng dalawang eroplanong "tora-tora" at apat na helikopter. Dahil sa pambobomba, pag-iistraping at pandarahas sa mga tagabaryo, napilitang magbakwit ang 2,497 residente ng mga barangay ng Telim, Malanog, Mansaka, Malatas, Cruz at Lagaan. Bunsod nito, isinailalim ng Sangguniang Bayan ng Calatrava sa *state of calamity* ang anim na barangay.

Nagsisiksikan ngayon ang mga bakwit sa mga *barangay hall*, kapi-ly, *day care center*, paaralan at bahay ng kanilang mga kamag-anak at kakilala, ayon sa alkalde ng Calatrava. Dahil sa sobrang takot, halos walang nadalang mga gamit ang karamihan ng mga bakwit. Sa ngayon ay marami nang bata ang nilalagnat at sinisipon dahil sa pagtulog nila sa malamig na sahig. Kulang na kulang ang naibibigay na gamot ng lokal na gubyrerno.

Sa kabiguan nilang masukol ang BHB, ang mamamayan ang pinagbuntunan ng militar ng kanilang galit. Gumagawa na lamang ang militar ng kung anu-anong mga kwento upang pagtakpan ito, ayon sa Karapatan-Negros. Pinabulaanan ng tatlong araw na *fact-finding mission* nito ang ulat ni Col. Gregorio Fajardo, hepe ng 303rd Infantry Brigade, na mga kasapi umano ng BHB ang tatlong menor de edad na dinakip ng militar sa Barangay Telim noong Oktubre 13.

Ang dalawa sa mga dinakip ay 15 taong gulang, taga-Barangay Malanog at nag-aaral sa Malanog Elementary School samantalang ang ikatlo ay isang kabataang 17 taong gulang na taga-Barangay Telim. Tinortyur ang tatlong kabataan, kasama ng dalawa pang sibil-yang sina Nathaniel Alesgar, 18 at Ruel Tapio, 21. Ayon sa kanilang ulat, iginapos silang parang baboy at limang minutong tinabunan ng plastik ang kanilang mga ilong at bibig habang pilit silang pinaaamin na mga rekrut sila ng BHB. Kinasuhan ng pulisya ang lima ng ili-

gal na pag-iingat ng mga baril at pampasabog.

Inireklamo rin ni Gaspar Villanueva, 55, na sapilitang ginawang *command post* ng isang platun ng Philippine Army at RPA ang bahay niya at ng kanyang bayaw habang nagsasagawa ng pag-iistraping at pambobomba ang mga militar. Pinagbawalan silang gumala sa baryo at pumunta sa kanilang mga sakan. Ninakawan din sila ng 15 manok na pansabong at mga personal na gamit.



Komboy ng militar, tinambangan sa Negros

Dalawang sundalo ng 11th IB ang nasugatan matapos sila tambangan ng mga gerilya ng Bagong Hukbong Bayan (BHB) sa Barangay San Isidro, Toboso, Negros Occidental noong hapon ng Oktubre 17. Galing ang komboy ng mga sundalo sa operasyong militar nila sa mga bulubunduking barangay ng Calatrava at Toboso nang tambangan ang kanilang sasakyan mga alas-4:30 ng hapon.

Halos dalawang linggo nang ginagalugad ng mga tropang militar mula sa Task Group North (kinabibilangan ng pinagsanib na mga pwersa ng 11th IB, 61st IB, 3rd Scout Ranger Company at paramilitar na Revolutionary Proletarian Army) ang mga bulubunduking bahagi ng Calatrava at Toboso sa pagtugis sa isang platun ng BHB na sumalakay sa ₱4.3 bilyong proyektong paliparan sa Barangay Bagtic, Silay City noong madaling araw ng Oktubre 9.

Mabilis na kinumpiska ng mga Pulang mandirigma ang 18 kalibre .38 rebolber, tatlong *shotgun* at walong radyong VHF ng mga nagbabantay sa paliparan. Pinasabog din ng BHB ang *computerized batching* at *cement paver* ng Hanjin International, ang kumpanyang Koreano na nagsasagawa ng konstruksyon, at ang *power generator* ng Takinaka Itochu, isang kumpanyang Hapones.



Patakaran ng RSOT ng 74th IB sa Bondoc Peninsula

"Bawal mabuhay"

Mistulang batas militar ang umiiral sa Bondoc Peninsula. Bawal sa mga magsasaka rito na umahon sa bundok para mangopra at magkaingin. Sinumang hindi sumunod rito ay pinararatangang nakikipagsabwatan sa Bagong Hukbong Bayan (BHB). Kapag mapayagang umahon sa bundok, kailangang bumaba rin sa hapon at magreport sa militar.

Mula nang pumakat dito ang Reengineered Special Operations Team (RSOT) ng 74th IB noong Hulyo 2006, mahigpit nang ipinapataw nito ang ganitong malulupit na patakaran sa 12 barangay ng General Luna at Catanauan, Quezon.

Hindi man lamang nag-aabala ang mga sundalo na tupdin ang sarili nilang "doktrina" sa RSOT na magbait-baitan at maging "propesyunal" at tularan ang kilos at gawi ng mga sandatahang yunit pampropaganda ng BHB upang makaakit din ng suporta ng mamamayan. Mula't sapul ay litaw na ang kanilang mga pangil at tunay na kulay. Sa loob ng ilang buwan nang pananatili nila sa mga barangay na saklaw ng kanilang operasyon ay di iilang magsasaka ang walang pakundangang dinahas, binugbog at tinakot ng mga kagawad ng RSOT ng 74th IB.

Ilampung mga magsasaka mula sa mga barangay ng Sumilang, Magsaysay, Recto, Lavides at Villarica sa General Luna at sa mga barangay ng Sta. Maria, San Vicente Kanluran at Silangan, Tagabas Iba-ba at Ilaya, Suha at Anyao ng Catanauan ang ipinatawag o kaya'y kinuha mula sa kanilang mga bahay at sapilitang dinala sa *barangay hall* na kinaroroonan ng RSOT o kaya sa mismong himpilan ng 74th IB sa Ajos, Catanauan. Iligal silang ibinibimbin nang mahigit 48 oras at ipinaailalim sa matindi at paulit-ulit na interrogasyon. May ilang ka-


so pang ang mga magsasaka ay tatlo hanggang apat na beses na pinababalik-balik sa himpilan ng 74th IB para sa interrogasyon. Malinaw na paglabag sa karapatangtao ng mga sibilyan ang mga ito. Sa pinakamenos, malaki itong perwisyo sa kanilang kabuhayan. Masahol pa, may kasama pang pananakot, pambubugbog at pagsasampa ng imbentong mga kaso. Paparami nang mga pamilya ang napipilitang magsilikas para makaiwas sa mga pandarahas at pananakot na ito ng mga pasistang militar.

Samantala, walang puknat ang malakihang operasyong militar ng AFP sa iba pang bayan ng Bondoc Peninsula tulad ng San Narciso, Buenavista, Mulanay at San Andres. Laganap din ang paglalagay ng mga tsekpoynt sa mga kalsada at daan na pumipigil sa

malayang pagbibyahe at mga aktibidad ng mga mamamayan. Sa Barangay Buenavista, San Narciso, may apat na magsasaka—sina Jovito Marco, Domingo Devida, Marmerto Rivadulla at Medwin Hiwatig—na kinuha ng mga militar noong Setyembre 10-13. Hanggang ngayon ay hindi pa inililitaw sina Marco at Hiwatig.

Namamayani sa mga barangay at bayang ito ang kalupitang militar na masasabing higit pa sa panahon ng batas militar ni Marcos. Nais palabasin ng mga pasistang militar na normal ang sitwasyon pero malinaw na takot lamang ang nililikha nito sa mamamayan. Pati ang mga lokal na upisyal mula barangay hanggang antas-prubinsya ay hindi nirerespeto ng AFP. May mga kagawad pa ng barangay na kinasuhan na rin ng rebelyon, kaya di rin nila maproteksyunan ang kanilang mga nasasakupan. Tanging ang mahigpit na pagkakaisa, pagpapalawak ng nagkakaisang prente

at pursigidong pagkilos ng mamamayan ng Bondoc Peninsula, kasabay ang pagsusulong ng BHB ng armadong pakikibaka ang hawani sa pasistang terror na bumabalot sa lugar.



Ang pagsusulong ng digmang bayan sa Ilocos-Cordillera

Nakapanayam ng *Ang Bayan* si Simeon Naogsan Sr. (Ka Filiw), tagapagsalita ng Cordillera People's Democratic Front (CPDF) hinggil sa pagsusulong ng armadong pakikibaka sa rehiyong Ilocos-Cordillera at kahandaan ng BHB na harapin ang mga tumitinding atake-militar dito.

Mataas na kahandaan sa pakikidigma. Mataas ang antas ng kahandaan ng mga Pulang mandirigma sa rehiyon sa pakikidigmang gerilya. Nagsisilbing malaking bentaha nila ang mga pagsasanay sa nakalipas na ilang taon. Kung kaya masasabi nating nasa katayuan silang paigtingin ang pakikidigmang gerilya.

Bukod sa mga regular na pagsasanay pulitiko-militar, nagdaraos din sila ng mga pagsasanay sa *special operations*, gawaing pangkalusugan, medikal at paniktik.

Nagkakaroon din ng pagsasanay sa isnayping na naaangkop at

nagmamaksimisa sa bulubundukin at magubat na tereyn ng rehiyon. Mabisang kublihan ng mga isnayper ang matatarik na mga bundok dito. Sa pamamagitan lamang ng mga tim o grupo ng mga isnayper, nagagawa ng BHB na mai-pako sa isang pusisyon ang mga nag-ooperasyong tropa ng AFP—kahit isang buong kumpanya ng kaaway.

Ani Ka Filiw, sa isang labanan sa Mt. Mugao, hindi nakaabante ang malalaking pormasyon ng kaaway dahil napapako sila ng mga isnayper ng BHB. Hindi rin nakalapit ang mga *helicopter gunships*

kapag may mga isnayper na nakapwesto sa mga tagaytay ng mataas na bundok, dahil kaya ng mga isnayper patamaan at pinsalain ang mga helikopter. Sa isa namang labanan sa hangganan ng Abra, Mt. Province at Ilocos Sur noong Hunyo, may isang helikopter na lubhang napinsala ng mga isnayper ng BHB.

Kasabay ng pagsasanay sa mga buong-panahong mandirigma, nagkakaroon din sa rehiyon ng mga pulitiko-militar na pagsasanay sa mga yunit ng milisyang bayan. Bahagi ito ng paghahanda sa pagsalag sa mga operasyong militar ng Reengineered Special Operations Team (RSOT) ng AFP sa kanilang mga baryo.

Patuloy na nagpapakahusay ang mga pwersa ng BHB sa pulitika, sa militar, sa pagkilos-gerilya, sa pagpapahigpit pa ng ugnay sa masa, sa pagkabisa sa tereyn at sa iba't ibang taktika at teknika sa paglaban.

Pagharap sa mga umaatakeng pwersa ng kaaway. Hindi kaya ng kaaway na sabayang pakatan ang lahat ng mga larangang gerilya sa Cordillera, laluna sa malawak na interyor. Dahil hindi sanay sa tereyn o kaya naman ay tinatamad umakyat sa bundok o natatakot pumasok sa gubat, nananatili na lamang sila sa kanilang kampo o di kaya'y sa mga komportableng lugar pumupwesto sa mga sentro at matatagong erya. Dahil din sa kahirapan ng tereyn, kadalasa'y kailangan ng napakalaking pakat—laking batalyon, kundi man laking-brigada—kapag nag-ooperasyon ang kaaway. Dahil dito, madaling sumingaw ang kanilang presensya at kagyat na nalalaman ng masa at Hukbo ang kanilang kilos. Kapag may naipagtatagumpay na operasyon ang BHB, laking-brigada o higit pa ang ganting salakay ng kaaway, sabay gamit ng mga *helicopter gunship* at pagpapaputok ng mga mortar.



Pagkatapos ay isinusunod ng kaaway ang mga operasyong RSOT sa baryo. Subalit di gaanong nagtatalagang ang ganitong operasyon dahil bukod sa magastos, madalas ay sumusuntok lamang sa hangin ang kaaway at lalo lamang nadedemoralisa.

Kahit sa laki ng bilang na kailangang ipakat ng kaaway sa mga operasyon sa interyor ng Cordillera, dahil sa hirap at lawak ng tereyn, hindi pa rin kayang kulungin ng kaaway ang pwersa ng BHB na panapanahong nagkokonsentra at nagdidispers. Kung saan-saan nanggagaling at paulit-ulit sumusulpot ang mga Pulang mandirigma na bigla na lang bumibira sa iba't ibang bahagi ng pormasyon ng kaaway at pagkatapos ay mabilisang mawawala sa di malamang direksyon.

Sa katunayan, tinitingnan ng BHB na mainam pa ngang masagpangan ang malakihang operasyon ng kaaway at makapaglunsad ng taktikal na opensiba laban sa mga nahihwalay na pwersa nila. Para mabisang magawa ito, kinakailangang dumugtong ang mga pwersa ng BHB sa magkakatabing prubinsya at larangan at makapagtipon ng sapat na pwersa.

"Kaya," ani Ka Filiw, "kailangan ding maglunsad tayo ng mga taktikal na opensibang nakadiseno rito, kasabay ng paglulunsad ng mga taktikal na opensiba laban sa mas maliliit na yunit ng kaaway na nakaposisyon sa mga detachment o naglulunsad ng operasyong RSOT."

Mabilis na pagtugon sa panawagan paigtingin ang mga TO. Mabilis na tinugunan sa rehiyon ng Ilocos-Cordillera ang panawagan ng Komite Sentral noong nakaraang taon na paigtingin ang mga taktikal na opensiba ng BHB bilang am-



Kung saan-saan nanggagaling at paulit-ulit sumusulpot ang mga Pulang mandirigma na bigla na lang bumibira sa iba't ibang bahagi ng pormasyon ng kaaway at pagkatapos ay mabilisang mawawala sa di malamang direksyon.

bag sa pagpapataksik sa rehimeng Arroyo. Nang maipaabot ang panawagan, agad na nagplano ang Komite ng Partido sa rehiyon ng mga koordinadong aksyong militar kung saan magtutulung-tulong ang magkakatabing larangan ng BHB. Tinukoy ang mga anihilatibo, at gayundin ang mga atritibong target ng mga taktikal na opensiba.

Sa pagharap sa mga laking-brigadang operasyon ng kaaway nitong huli, matagumpay na naisagawa ang mga koordinadong plano kung saan nagtulungan at may mga pagkakataong nagsanib din ang magkakatabing mga prubinsya at larangan at iba pang yunit sa pagharap sa kaaway.

Matatagumpay na taktikal na opensiba. May naitalang 28 taktikal na opensiba sa ICR mula 2005 hanggang kalagitnaan ng 2006 kung saan 61 malalakas na armas ang nasamsam. Umabot sa 50 tropa ng reaksiyunaryong sandatahang pwersa ang napaslang at 23 ang nasugatan sa mga opensibang ito. Sa kabilang banda, sampung Pulang mandirigma ang nasawi habang pito ang nasugatan. Nabawasan din ng sampung armas ang BHB.

Tampok sa mga labanang ito ang anim na taktikal na opensiba—ang mga opensiba sa Barangay Tiempo, Tubo, Abra noong Hunyo 8, 2005; sa Bessang Pass sa Ilocos Sur noong Hunyo 19, 2005; sa hangganan ng Abra, Mountain Province at Ilocos Sur noong Hunyo 9-21, 2005 at muli, noong Mar-

so 15-24, 2006; sa Barangay Cabiten, Mankayan, Benguet kung saan nagapi ng mga Pulang mandirigma ang detachment ng 54th IB-CAFGU noong Pebrero; at sa hangganan ng Abra at Mt. Province noong Hulyo 7. Talumpu't isang armas ang nasamsam sa Tiempo at 29 sa mga ito ang malalakas. Sa Cabiten, 23 malalakas na armas ang nakuha bukod sa mga pistola.

May tinukoy si Ka Filiw na ilang matitingkad na aral sa nakaraang mga taktikal na opensiba ng BHB:

"Una, napakahalaga ng mahigpit na ugnayan ng BHB at masa. Kung wala ang malawak, masinsin at matatag na suportang masa sa mga lugar na kinikilusan natin sa Cordillera, hindi makakamit ng Partido at BHB ang mga tagumpay. Kung wala ito, hindi sana natin nakayanan ang pagsalakay kamakailan ng dalawang brigada ng kaaway sa hangganan ng Abra, Ilocos Sur at Mt. Province. Sa panahong ito, sa masa nanggaling ang mahahalagang impormasyon, pagkain at iba pang suporta sa Hukbo. Ang mga lokal na pwersa ng milisyang bayan din ang bumuo ng ating mga *blocking force*."

"Ikalawang mahalagang aral ay ang kasapatan ng mga pagsasanay natin, kapwa ng batayang pagsasanay pulitiko-militar at mga espesyal na pagsasanay.

"At ikatlo ang mahusay na pagkabisa natin sa tereyn—ang paggamit natin ng mga bentahe nito at ang pag-alam din natin sa mga maaaring disbentahe." AB

Nais ibagsak ng rehimeng Arroyo

"Ang rehimeng Arroyo ang responsable sa pagbagsak ng usapang pangkapayapaan." Ito ang pahayag ng pamunuan ng Moro Islamic Liberation Front (MILF) matapos mabigo noong Setyembre 7 ang ika-13 *exploratory talks* (mga usapan para makapaghanap ng kalutasan sa di pagkakasundo) sa pagitan ng mga kinatawan nito at ng Gubyerno ng Republika ng Pilipinas (GRP).

Nang simulan ang pag-uusap sa Kuala Lumpur, Malaysia, umasa ang MILF na seryoso ang GRP na makipag-ayusan ukol sa usapin ng teritoryong iginigiit ng mamamayang Moro na kanilang lupang ninuno at saklaw ng "pinaunlad na awtonomya" ng Bangsamoro. Ang usaping ito ang pinakamalaking balakid sa pagbubuo ng kasunduan ng MILF at GRP. Ito rin ang usaping nasa pina-kaubod ng pakikibaka ng mamamayang Moro para sa sariling pagpapasya.

Noong Mayo, nagpahayag ng panimulang pakikipagkasundo ang GRP sa konsepto, pamamahala, pagbabahaginan ng rekursu at pagtutukoy ng saklaw ng lupang ninunong siyang magiging teritoryong maipailalim sa Bangsamoro Juridical Entity (BJE). Umayon ang GRP na ipailalim sa BJE ang limang probinsya ng ARMM, isang syudad at 613 pang barangay sa labas ng ARMM kung saan mayorya ng mga naninirahan ay mga Moro. Nangako ang rehimen na ipagkakaloob nito ang naturang mga teritoryo nang walang kundisyon, alinsunod na rin sa Agreement of Peace na pinirmahan ng MILF at pamahalaang Arroyo sa Tripoli, Libya noong 2001 na kumilala sa makasaysayan at makatarungang karapatan ng Bangsamoro sa kanilang lupang ninuno at sariling teritoryo. Lagpas dito, iginigiit ng MILF ang mahigit 1,000 pang barangay kung saan ang nakararami ring naninirahan ay Bangsamoro. Kailangan ding maidugtong-dugtong ang hiwa-hiwa-

lay na pira-pirasong lupang nakapaloob sa kasalukuyang Autonomous Region of Muslim Mindanao (ARMM). Para sa MILF, hindi maitatayo ang tunay na awtonomya kung wala itong sinasaklaw na iisang buong teritoryo. Batay dito, sinabi nitong kailangang mapalawak na ang kasalukuyang saklaw ng ARMM.

Ngunit nitong Setyembre ay tulong idineklara ng mga kinatawan ng GRP na wala silang awtoridad na makipagnegosasyon kaugnay sa mga teritoryong lampas sa sinasaklaw na ng ARMM dahil taliwas umano ito sa konstitusyon. Kinwestyon din ng GRP kung nakararami nga ba ang Moro sa iba pang hinihinging barangay. Iginigiit din nito na kailangang idaos ang isang reperendum upang alamin kung sasang-ayong maipailalim sa

awtonomus na rehiyong Bangsa-moro ang mga naninirahan sa mga dagdag na teritoryo.

Bilang resolusyon umano, hini-mok ng rehimeng Arroyo na suportahan na lamang ng MILF ang "Cha-cha" o pagbabago sa konstitusyon.


Ang mga hakbanging ito ng rehimeng Arroyo ay pawang pagsasara ng pinto sa anumang posibilidad na sumulong pa ang usapang pangkapayapaan. Dahil dito, naobliga ang MILF na umatras sa usapan at maghanda para sa pagbabalik sa landas ng armadong pakikipaglaban. Hindi na nila masikmura ang pagpapaikut-ikot at panloloko ng rehimen. Maging ang mga kinatawan ng Malaysia na nagsilbing *facilitator* ay nagbanta ring tumiwalag sa usapan. Anila, hangga't hindi binibigyan ng rehimeng Arroyo ang mga kinatawan nito ng awtoridad na makipagnegosasyon, "walang silbi at walang mara-rating" ang usapan.

Hindi na bago sa MILF ang pagta-



traydor, panghaharang at taha-sang pambabastos ng reaksyunaryong rehimen sa hangarin ng mamamayang Moro. Muli lamang ipinakikita ng rehimeng Arroyo na wala itong intensyon at interes na mapayapang resolbahin ang mga usaping kinakaharap ng Bangsamoro. Malinaw na ipinakikita ng rehimeng Arroyo sa MILF kung paano nitong ginagamit ang usapang pangkapayapaan para sa pansariling interes kabilang ang pagkuha ng suporta ng MILF sa Cha-cha. Wika ng MILF, insulto para sa isang rebolusyonaryong organisasyon tulad nila na pumailalim sa konstitusyon ng republika at dito iasa ang pagkilala sa karapatan nila.

Batid rin ng MILF na ginagamit lamang ng rehimeng Arroyo ang usapan bilang taktika sa "counter-insurgency." Kasabay ng mga maniobra nito sa usapang pangkapayapaan, naglulunsad ito ng kampanya upang siraan at pahinain ang mga pwersa ng MILF. Kabilang dito ang pag-aakusang isang teroristang organisasyon ang MILF, na kadikit nito ang mga bandidong grupong Abu Sayyaf at Jemaah Islamiyah, at na ito ang nasa likod ng mga pambobomba sa matataong lugar sa Mindanao at Luzon.

Handa ang MILF, ang Bangsamoro Islamic Armed Forces (BIAF), mga organisasyong masa at mamamayang Moro na muling pasiklabin ang armadong pakikipaglaban sa reaksyunaryong gubyrno ng Pilipinas bilang tugon sa panloloko at tuluy-tuloy na pandarahas nito sa kanila. Katunayan, non pa man ay handa na ang MILF at mga pwersa at tagasuporta nito sa ganitong posibilidad. Anila, bagamat mahalaga ang prosesong pangkapayapaan, hindi sila maaaring pumirma sa isang kasunduang nagmamaliit sa kagalingan at mga karapatan ng Bangsamoro. 

Kasaysayan ng pananabotahe

Patuloy na ipinakikita ng reaksyunaryong gubyrno, laluna ng rehimeng Arroyo, na hindi ito interesadong kamtin ang tunay na kapayapaan para sa mamamayang Moro. Ang tanging interes ng rehimen ay sumuko at magbaba ng armas ang MILF.

Mula't sapul. Sinimulan ang usapang pangkapayapaan noong 1997 sa ilalim ng rehimeng Ramos. Sa loob ng dalawang taon, nabuo ang mga mayor na kasunduan kabilang ang General Agreement for Cessation of Hostilities (1997), ang General Framework of Agreement of Intent (1998) at ang kasunduan para sa pagbubukas ng pormal na negosasyon (1999). Subalit sarisaring balakid ang inihaharang ng GRP sa bawat pihit ng usapan.

Sa mismong pagbubukas ng pormal na negosasyon, naglunsad ang AFP ng panibago at mas malaking operasyong militar sa mga teritoryo ng MILF. Mula sa 17 batilyong nakatuon sa MILF noong 1999, idinagdag ng AFP rito ang 25th, 39th at 40th IB, Philippine Marines at Scout Rangers ng 6th Infantry Division na nakabase sa Maguindanao; ang 41st at 81st IB sa ilalim ng 4th ID na nakabase sa Cagayan de Oro City; at isang *contingent* mula sa 301st Brigade sa ilalim ng 3rd ID na nakabase sa Visayas.

Todo Gera I. Noong 2000, sa utos ng noo'y presidente Joseph Estrada, sinalakay ng AFP ang Camp Abubakar, ang pangunahing himpilan ng MILF sa kabila ng umiiral noong tigil-putukan at kahit pa katatapos lamang sumangayon ng GRP sa kasunduan kaugnay sa pag-atras ng mga pwersa ng MILF sa mga teritoryo nito. Hindi pa man nakakabwelo, gumuho na ang usapang pangkapayapaan. Sa loob ng sumunod na mga buwan, walang awat ang mga pag-salakay ng AFP sa mga teritoryo ng MILF.

Mahigit 400,000 mamamayang Moro ang napilitang lumikas mula sa kanilang mga komunidad bunga ng todo-gera laban sa MILF.

Dahil dito, nagpasya ang pamunuan ng MILF na magdeklara ng *jihad* o "banal na gera" laban sa rehimeng Estrada noong Setyembre 2000. Nasa kasagsagan ang naturang *jihad* nang mapatalsik si Estrada noong Enero 2001.

Usapang pangkapayapaan. Noong 2001, nagkasundo ang MILF at rehimeng Arroyo na muling buksan ang pormal na usapan. Nagdeklara ang MILF ng suspensyon ng mga operasyong militar. Nabuo noong Hunyo sa Tripoli, Libya ang Kasunduan para sa Kapayapaan sa pagitan ng GRP at MILF, na mas nakilala bilang MILF-GRP Tripoli Agreement on Peace of 2001. Nakasaad sa naturang kasunduan ang mga substantibong adyenda ng negosasyon kabilang ang tungkol sa 1) aspetong panseguridad o tigil-putukan; 2) rehabilitasyon at pagpapaunlad ng mga lugar na nawasak dahil sa militarisasyon; at 3) lupang ninuno.

Nabuo ang kasunduan ukol sa unang dalawang adyenda. Subalit mula noon ay wala pang nabubuong kasunduan ukol sa usapin ng lupang ninuno, ang pinakaubod ng pakikibaka ng mamamayang Moro. Mula 2003 ay ginagawa na ng rehimeng Arroyo ang lahat ng paraan upang ipagpaliban o isaisantabi ang pag-adyenda rito habang iniawasan nitong mawalan ng bisa ang iba pang kasunduan, laluna yaong hinggil sa tigil-putukan.

Todo Gera II. Bago pa man magsimula ang ikatlong adyenda

noong Pebrero 2003, nagtambak na ang rehimen ng ilandaang tropa sa paligid ng Liguasan Marsh. Mula rito, naglunsad ng malawakang operasyon ang AFP sa mga baryo ng Cotabato at Maguindanao. Unti-unting dinagdagan ng AFP ang mga tropa nitong nakadeploy sa Pikit, North Cotabato noong unang linggo ng Pebrero.

Noong Pebrero 11, sa kabila ng kasunduan para sa tigil-putukan at ng nakatakdang pormal na pag-uusap sa araw na iyon, nagsagawa ng malawakan at walang pakundangang pambobomba ang mga pwersa ng AFP sa Rajahmuda at Buliok sa bayan ng Pikit. Umabot sa 20,000 sibilyang Moro ang napilitang lumikas. Marami ang namatay at mas marami pa ang nasugatan.

Upang muling masabotahe ang usapan, isinagawa ng rehimen ng Arroyo ang pambobomba sa Sasa Wharf at Davao International Airport noong Abril 2003 (bagay na pinatotohanan ng mga sundalong lumahok sa Oakwood Mutiny). Pinalalabas noon ng rehimen ng Arroyo na ang mga pambobombang iyon ay gawa ng MILF. Muling nagdeklara ang GRP ng todo-gera laban sa MILF, karakarakang kinasuhan ang mga upisyal nito at inilabas ang kautusang arestuhin ang noo'y tagapangulo nitong si Hashim Salamat at ang buo nitong Komite Sentral. Muling gumuho ang pormal na usapan.

Lupang ninuno. Pagsapit ng Disyembre 2004, dumating sa Pilipinas ang International Monitoring Team na binubuo ng mga kinatawan mula sa mga bansang kasapi ng Organization of Islamic Conference. Dahil dito, bahagyang naglubay ang AFP sa mga paglabag nito sa tigil-putukan at sa karapatang-tao ng mamamayang Moro. Binigyang-daan din nito ang pagtalakay sa usapin ng lupang ninuno ng mga Moro.

Subalit mula noon ay matagal

Pambobomba sa Mindanao, pakana ng rehimen

Sa isa na namang pagtatangkang siraan at pahinain ang pamunuan ng MILF, kinasuhan nitong Oktubre sina Chairman Ebrahim Al Haj Murad at mga kumander ng MILF ng pamamaslang kaugnay ng sunud-sunod na pambobomba na naganap sa Tacurong, Sultan Kudarat; Makilala, North Cotabato; at Cotabato City ngayong buwan. Anim ang namatay at 36 ang nasugatan sa mga insidenteng ito.

Kinasuhan si Murad at iba pang upisyal sa kabila ng mga pahayag ng panel ng gubyrno ng Pilipinas na nakikipagnegosasyon sa MILF na wala silang nakitang ebidensya na may kinalaman ang MILF sa mga pambobomba. Nagpahayag maging ang mga kinatawan ng lupon ng gubyrno ng Pilipinas na nakikipagnegosasyon sa MILF na “di makatwiran” at dapat iwasan ang paggawa ng mga akusasyong ito. Agad ring itinanggi ni Eid Kabalu, tagapagsalita ng MILF, na may kinalaman sila sa naturang mga krimen at nag-alok pa ito ng tulong sa rehimen para mahuli ang mga salarin.

Gayunpaman, desidido ang mga militarista sa Mindanao, sa pangunguna nina North Cotabato Gov. Emmanuel Piñol at Chief Supt. German Doria, hepe ng PNP sa Central Mindanao na kasuhan ang MILF upang mawalan ito ng kredibilidad sa loob at labas ng bansa, laluna sa mga tagasuporta nito sa Organization of Islamic Conference. Sa gayon, hihina ang pwesto ng MILF sa pakikipagnegosasyon at maipipilit ng rehimen ang pinal na kasunduang nais nitong papirmahan sa MILF. Ito rin ang paraan ng mga militarista para pagmukhaing demonyo at kasuklam-suklam ang MILF sa mata ng mga organisasyon, institusyon at personalidad na sumusuporta sa prosesong pangkapayapaan. Si Piñol ay isa sa pinakamasusugid na kumontra sa pakikipag-usap ng GRP sa MILF at nagsisilbing tagabudyong ng mga militaristang sentimyento at tunguhin ng rehimen at mga armadong galamay nito. Malaon nang naghahanap ang mga ito ng dahilan upang ibagsak ang usapan at tuluyan nang atakehin ang MILF.

Anumang mga pahayag ng mga kinatawan ng *peace panel* ng GRP ay binabawi rin sa mga pahayag ng ibang mga myembro ng gabinete ng rehimen. Kabilang dito ang mga pahayag ni Executive Secretary Eduardo Ermita kaugnay sa pagsasampa ng kaso. Itinatangi niyang may kinalaman ang rehimen sa aktwal na pagsasampa (ang pormal na nagsampa ay mga kamag-anak ng mga nasawi sa Tacurong). Ngunit kasabay nito, iniutos niya ang pag-imbetiga sa pinagsasabi nina Piñol at Doria na pakikipagsabwatan umano ng mga myembro ng MNLF at MILF sa mga grupong nagsagawa ng mga pambobomba. AB

na uminog ang usapan sa pagmamatigas ng GRP kaugnay ng usapin ng lupang ninuno. Tuwing may natatapos na kahit mababang antas ng talakayan tungkol sa usaping ito, pinalalabas ng Malakanyang na

may “malaking breyktru” na nakamit sa usapang pangkapayapaan. Lumabas ang katotohanan hinggil sa pagbagsak ng usapan matapos ang ika-13 *exploratory talks* nitong Setyembre 7. AB

Ang biglang pagsirit ng presyo ng kuryente sa WESM

Ang Wholesale Electricity Spot Market (WESM) ay itinayo ng guberno nito lamang Hunyo sa bisa ng Electric Power Industry Reform Act of 2001 (EPIRA) para mapabilis ang proseso ng pribatisasyon ng serbisyo sa kuryente sa Pilipinas. Layon din umano nitong magsilbing pampublikong pamilihan ng kuryente upang maistabilisa at mapababa ang presyo ng kuryente.

Subalit sa kapinsalaan ng mamamayan ay kabaligtaran nito ang nangyayari. Nitong Oktubre, nabunyag na sadyang pinatataas ng malalaking burukrata ang presyo ng kuryente sa WESM para sa sarili nilang kapakinabangan.

Sa WESM bumibili ng dagdag na kuryente ang mga distribyutor nito, kabilang ang Manila Electric Company (Meralco), pati na ang ibang independyenteng prodyuser ng kuryente o *independent power producers* (IPP) na nagkukulang sa produksyon ng kuryente. Binibili nila ito sa mga prodyuser ng kuryente, pangunahin na ang guberno na nagmamay-ari ng National Power Corporation at mga IPP.

Pinatatakbo ang WESM na tulad ng mga pamilihan ng sapi (*stock exchange*). Pero dahil kontrolado ng Power Sector Assets Liabilities and Management Corporation (PSALM) ang malaking bahagi ng kuryenteng pinoprodyus (50% ng kabuuang nabebenta sa WESM), mabisa nitong namomonopolisa ang pampublikong pamilihan sa kuryente. Ang PSALM ang ahensya ng guberno na binuo ng Malakan-yang sa bisa ng EPIRA para mamahala sa pribatisasyon ng Napocor at 31 planta nito. Ito rin ang nangangasiwa sa pagbebenta ng kuryenteng pinoprodyus ng mga ito. Gamit ang monopolyo ng PSALM sa suplay ng kuryente, nagagawa ng malalaking burukratang namamahala rito na manipulahin at pata-

asin ang presyo ng bentahan ng kuryente sa WESM para sa kapakinabangan nila at ng kanilang mga kakutsaba.

Mula nang simulan ang operasyon ng WESM nitong Hunyo, sa halip na mag-istabilisa at bumaba ay naging mabuway at pasirit ang presyo ng kuryente. Mabilis na tumaaas (75%) ang karaniwang presyo ng kuryente—mula ₱2.788 kada *kilowatt-hour* (kWh) noong unang buwan ng operasyon ng WESM tungong ₱4.853 kada kWh sa ikatlong buwan (Agosto 26-Setyembre 25). Nitong huling dalawang buwan, tumaas pa nang 250% at

umabot pa sa ₱6.80 kada kWh ang presyo ng kuryente sa WESM.

Sinimulan nang imbestigahan ng Philippine Electricity Market Corp. (PEMC) ang PSALM. Ang PEMC ang tagapamahala, opereytor at tagamonitor ng WESM. Anang PEMC, walang maaaring ibang dahilan ng biglaang taas ng presyo ng kuryente sa pampublikong pamilihan liban sa sadyang manipulasyon ng presyo, dahil nitong nakaraang mahigit tatlong buwan mula nang itatag ang WESM ay wala namang malaking pagbabago sa suplay at demand ng kuryente.

Samantala, sa desperasyong magpakitang-tao, iniutos ni Gloria Arroyo na imbestigahan ang biglaang pagtaas ng presyo ng kuryente sa WESM. Katawa-tawa na ang inatasan niyang mag-imbestiga ay sina Finance Secretary Margarito Teves, Justice Sec. Raul Gonzalez at Trade and Industry Sec. Peter Favila gayong si Teves ang tagapangulo ng PSALM at mga *ex-officio member* naman ng Board of Directors ng PSALM sina Gonzales at Favila. AB

Ang EPIRA

Ang RA 9136 o Electric Power Industry Reform Act (EPIRA) of 2001 ay batas na nagtatakda ng deregulasyon sa serbisyo ng kuryente at nagsasapribado sa National Power Corporation (Napocor). Sa EPIRA, hindi na itinuturing na *public utility* ang operasyon para sa produksyon at pagsusuplay ng kuryente. Nilusutan ng EPIRA ang probisyon sa reaksyunaryong konstitusyon na nagbabawal sa pag-aari ng mga dayuhan sa mga *public utility*.

Ginagamit sa batas na ito ang mga salitang “reporma” at “restructuring” upang itago ang tunay nitong layuning ipatupad ang deregulasyon at pribatisasyon ng kalakhan ng serbisyo sa kuryente. Isa sa mga repormang ito ang pagtatatayo sa WESM na umano’y magsasalamin sa tunay na presyo ng kuryente.

Niratsada ni Gloria Arroyo ang pagkakapasa ng batas na ito bilang tugon sa mga kundisyon ng International Monetary Fund at mga imperyalistang bangko kapalit ang mga pautang.

(Para sa mas detalyadong pagtalakay, maaaring balik-aralan ang praymer hinggil sa EPIRA na inilabas ng Kawanihan sa Impormasyon ng PKP noong Hunyo 2001.) AB

Malawakang pagsasanay militar ng US at AFP, tinuligsa ng PKP

MARIING tinuligsa ng Partido Komunista ng Pilipinas (PKP) ang Talon Vision at Amphibious Landing Exercises (Phiblex), mga malawakang pagsasanay militar ng pinagsanib na mga tropa ng US at Armed Forces of the Philippines na nagsimula noong Oktubre 16 at magtatapos sa Oktubre 31. Isa itong "nagpapatuloy na paglabag sa independensya at soberanya ng Pilipinas," anang PKP. Nagbabala rin ang PKP laban sa paggamit ng US ng teritoryo ng Pilipinas bilang "lunsaran o suportang base para sa agresyong militar laban sa Democratic People's Republic of Korea (DPRK)." Pagkatapos ng gera sa Vietnam, muling ginamit ng US ang Pilipinas bilang isa sa mga baseng lunsaran nito sa pagsakop sa Iraq noong 1989-1990 at noong 2003.

Nagbabala rin ang PKP hinggil sa pagdami ng mga ipinapakat na tropang Amerikano sa mga magkasanib na pagsasanay militar sa Pilipinas na anito'y "pagkundi syon sa isipan ng mamamayan para tanggapin ang

sumasaklaw at nagpapatuloy na interbensyong militar ng US dito at maging sa ibang bansa." Ginagamit na komoplahe ang mga pinagsanib na pagsasanay militar na ito para ikubli ang direktang paglahok ng mga tropa ng US sa mga operasyong kombat at paniktik, pangangalap ng impormasyon at direktang pamilyarisasyon sa mga lugar sa bansa na ipinagpapalagay na kinikilusan ng mga rebolusyonaryong pwersa.

Nilalahukan ang Talon Vision at Phiblex ng 5,700 tropa ng US Marines at 1,300 tropa ng AFP mula sa Philippine Army, Philippine Navy at Philippine Air Force. Ang mga pwersa ng US ay nagmula sa 3rd Expeditionary Brigade na nakabase sa Okinawa, Japan at Essex Expeditionary Strike Group na nakabase sa Sasebo, Japan. Ang mga pagsasanay ay inilulunsad sa Clark Field, Angeles City at Floridablanca, Pampanga; Ternate, Cavite; Subic, Zambales; Fort Magsaysay, Nueva Ecija; at sa Palawan.


Pagtaas sa presyo ng palay, iginiit

SA udyok ng pagpipiket ng Kilusang Magbubukid ng Pilipinas sa Department of Agriculture nitong unang linggo ng Oktubre, pina- ngakuan sila ng kagawaran na ita- taas nang P5/kilo ang presyo ng palay na bibilhin ng National Food Authority mula sa mga magsasaka ngayong anihan. Ang pangakong ito ay resulta ng matagal na pag- gigiit ng mga magsasaka na itaas ang presyo ng palay mula P7-9/ki- lo tungong P12-15/kilo nang sa gayon ay maibsan ang matinding kahirapan ng milyun-milyong magsasaka sa buong bansa.

Napakababa na ng kita ng mga magsasaka dahil la- bis na binabarat ng mga komersyante sa palay ang pagbibili ng palay mula sa mga magsa- kang desperadong magbenta ng kanilang kaunting naisal- bang ani matapos ang matinding pinsalang idinulot ng bagyong Mi- lenyo sa kanilang mga palayan.

Ibinagsak ng mga gahamang ko- mersyante hanggang P4-8/kilo la- mang ang pagpepresyo sa palay ng mga magsasaka.

Umabot sa P162 milyon ang tinatayang halaga ng mga pana- nim na nasalanta ng bagyo sa Bi- col, Southern Tagalog at Central Luzon pa lamang. Tinatayang mangangailangan ng minimum na P40,000 ang bawat magsasaka pa- ra makapagsimu- la muli.



Arroyo, inutil sa paglutas sa mga pamamaslang —Senado

BINATIKOS ng Senado ang rehi- meng Arroyo sa kabiguan nitong bigyang-katarungan ang mga pi- naslang na aktibista, mamamaha- yag at huwes sa bansa. Sa isang 16-pahinang pahayag na inilabas kasabay ng pinag-isang ulat ng mga komite ng Senado sa *public order and illegal drugs, justice and human rights* at *public information and mass media*, sinabi rin ng Se- nado na di iilang sundalo at mara- ming bayarang mamamatay-tao ang sangkot sa mga pamamaslang na nagaganap sa bansa, ngunit walang ginagawa ang gubyrno para harapin ito.

Ang pahayag at ulat ay nilaga- daan di lamang ng mga oposisyu- nistang senador kundi ng mga ka- partido ni Arroyo sa Senado tulad nina Sen. Ralph Recto, Richard Gordon, Manuel "Lito" Lapid, Se- nate Pro Tempore Juan Flavio, Pia Cayetano at Majority Leader Fran- cis Pangilinan.

Pandaigdigang presyur sa rehimeng Arroyo, tumitindi

PATULOY ang pagtindi ng presyur mula sa mga abugado at mambabatas ng ibang bansa laban sa rehimeng Arroyo sa harap ng walang awat nitong panggigipit at pamamaslang sa mga kritiko at oposisyon.

Nagpasya ang International Association of People's Lawyers (IAPL) na igiit ang agarang pagpapalaya kay Rep. Crispin Beltran ng partidong Anakpawis sa ikatlong kongreso nito noong Oktubre 12-14 sa Davao City. Iginiit din nito ang pagbabasura sa *anti-terror bill*; pag-atras ng lahat ng mga tropang Amerikano sa Mindanao; muling pagbubukas ng negosasyong pangkapayapaan sa pagitan ng NDFP at GRP; paggalang sa mga karapatan ng mga katutubo; at pagpapatigil sa mga ekstrahudisyal na pamamaslang at iba pang karahasan ng estado.

Binuo ang IAPL noong Disyembre 2000 ng mga abugado, huwes, estudyante ng abogasya, mga ligal at paraligal na manggagawa mula sa Afghanistan, Belgium, Colombia, Greece, India, Nepal, The Netherlands, Pilipinas at Turkey. Nitong huli ay nadagdag na mga bagong myembro nito ang mga kinatawan mula sa Brazil at United Kingdom. Dumalo naman bilang mga panauhin at tagamasid ang mga representante mula sa Canada, Congo, Cuba, Germany at Spain.

Samantala, nanawagan din si Sen. Ana Consuelo "Jamby" Madrigal nitong Oktubre 20 sa pulong ng Par-

liamentarians' Caucus on Human Rights in the Philippines na ipresyur ng ibang bansa ang rehimeng Arroyo para matigil ang pagsasabatas ng *anti-terror bill* at ang sunud-sunod na mga pampulitikang pamamaslang at pagdukot. Aniya, titindi ang mga paglabag sa karapatang-tao kung maisasabatas ang anti-terror bill.

Bago ito, iginiit din sa pulong plenaryo ng Governing Council ng Inter-Parliamentary Union (IPU) nitong Oktubre 19 na kagyat nang palayain si Ka Bel. Ang IPU ay pandaigdigang asosasyon ng mga mambabatas mula sa iba't ibang panig ng mundo. Nagdaos ito sa Geneva, Switzerland ng ika-115 nitong asembleya nitong Oktubre.

Nagpahayag din ang IPU ng lubhang pagkabahala sa kasong rebelyon na isinama kina Ka Bel, Ka Satur Ocampo at kapwa nila progresibong mambabatas na sina Teodoro Casiño, Joel Virador, Rafael Mariano at Liza Maza. Anang IPU, ang pagturing ng rehimeng Arroyo sa rebelyon bilang "nagpapatuloy na krimen" ay taliwas sa mga pandaigdigang pamantayan. Kinundena rin nito ang pagtatangka ng gubyernong Arroyo na ikrimalisa at gawing ilegal ang mga lehitimong partido tulad ng Bayan Muna at Anakpawis na lumahok sa halalan noong 2002 at 2004, at ang tangka ring pigilan ang pagbyahe nina Ocampo palabas ng bansa sa kabila ng pahintulot ng korte.

Suspensyon ni Mayor Binay, naipagpaliban

NAIPAGPALIBAN ang pakana ng Malakanyang na patalsikin si Mayor Jejomar Binay ng Makati City nang iba-ba ng Court of Appeals nitong Oktubre 19 ang *temporary restraining order* na pumipigil nang 60 araw sa pagpapatupad ng suspensyon ni Binay. Iniutos ng Malakanyang ang suspensyon ni Binay gamit ang paratang ng isang karibal niya sa pulitika na nagmamantini umano siya ng "ghost employees." Kasama niyang suspendido ang bise alkalde at ang buong konseho ng Makati.

Ang hakbang ng Malakanyang ay pakana upang maagaw ang mga balwarte ng oposisyon sa Metro Manila, mapahina ang mga kalaban nito sa pulitika bago mag-eleksyon at makuha ang umaabot sa P8 bilyong taunang kinikita ng Makati City.

Si Binay, pinuno ng United Opposition, ay isa sa mga pangunahing lider ng oposisyong anti-Arroyo. Sa ilalim ng kanyang pamamalakad ay naging mahalagang sentro ng mga kilos protesta ang Makati, lalupa't

sinusupil ng ibang mga maka-Arroyong alkalde ng Metro Manila ang mga rali at demonstrasyon.

Gayon na lamang ang determinasyon ng Malakanyang na pwersahang alisin si Binay sa pwesto, kaya nagtalaga ito ng 1,500 tropa mula sa PNP, Philippine Army, Philippine Navy at Philippine Airforce. Subalit hindi rin nakakilos ang mga tropa nang magsidagsaan ang umabot sa 5,000 alyado, kakilala, kaibigan at mga mamamayan ng Makati at iba pang munisipalidad para sumuporta kay Binay. Kabilang din sa mga nagpahayag ng suporta sina Bayan Muna Rep. Satur Ocampo, dating Bise Pres. Teofisto Guingona, dating Pres. Corazon Aquino, Susan Roces at mga obispo ng simbahang Katoliko.

Bago ito, ipinasuspindi na rin ng Malakanyang si Mayor Wenceslao "Peewee" Trinidad, oposisyunistang alkalde ng Pasay City at ang halos buong konseho ng syudad dahil umano sa mga anomalya sa kontrata ng pagkolekta ng basura.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 20
Oktubre 21, 2006
www.philippinerevolution.org

Editorial

Pagpaslang kay Bishop Ramento, tanda ng kalupitan ng rehimeng Arroyo

Ang karumal-dumal na pagpaslang noong Oktubre 3 kay Bishop Alberto Ramento, makamasa at patriyotikong tagapangulo ng Supreme Council of Bishops ng Iglesia Filipina Independiente (IFI) ay tanda ng pagtindi ng kalupitan ng rehimeng US-Arroyo sa kampanya nito ng pamamaslang sa mga kritiko nito at paghahasik ng lagim sa lumalabang mamamayan.

Sa pagpaslang kay Bishop Ramento, ipinamalas ng rehimen na hindi ito nangingimang patayin maging ang matataas na lider-simbahan na pinagpipitaganan dahil sa pagiging masugid na aktibista para sa tunay na pambansang kalayaan at demokrasya at puspulang pagtataguyod sa mga interes at karapatan ng mama-

mayan, laluna ng masang anakpawis.

Alam na alam ng rehimen na ang pagpatay kay Bishop Ramento ay maaaring lalong gumatong sa matindi nang galit ng malawak na mamamayan. Kaya gayon na lamang ang pag-iiskrip ng pagpatay sa obispo at pagtatakip ng kanilang pasistang krimen upang palabasing isa lamang itong "simpleng kaso ng pagnanakaw at pagpatay na gawa ng isang karaniwang kriminal."

Pero nagkakamali ang rehimen sa pag-aakalang basta na lamang lulunukin ng taumbayan ang



***Mga tampok sa
isyung ito...***

**"No man's land" sa
Negros** PAHINA 4

**Komboy ng militar
inambus sa Negros**
PAHINA 4

**Pagsirit ng singil sa
kuryente** PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*